

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренцијски савет*

**MIŠLJENJE**

**po zahtjevu privrednog subjekta „TROIPIK MALORODAJA“ d.o.o. Banja Luka**

**Sarajevo,  
novembar, 2023. godine**



Broj: 01-26-7-12-4/23  
Sarajevo, 9.11.2023. godine

Konkurencijsko vijeće Bosne i Hercegovine, na osnovu člana 25. stav (1) tačka f) Zakona o konkurenciji („Službeni glasnik Bosne i Hercegovine“, broj 48/05, 76/07 i 80/09), a po Zahtjevu za mišljenje privrednog subjekta „TROPIK MALORODAJA“ d.o.o. Banja Luka, Ivana Gorana Kovačića bb, 78 000 Banja Luka, Bosna i Hercegovina, na 128. (stotinudvadesetosmoj) sjednici održanoj dana 9.11.2023. godine, donijelo je

### **MIŠLJENJE**

Privredni subjekat „TROPIK MALORODAJA“ d.o.o. Banja Luka, Ivana Gorana Kovačića bb, 78 000 Banja Luka, Bosna i Hercegovina (u daljem tekstu: TROPIK MALOPRODAJA ili Podnosilac zahtjeva), podnio je Konkurencijskom vijeću Bosne i Hercegovine (u daljem tekstu: Konkurencijsko vijeće) Zahtjev za davanje mišljenja (u daljem tekstu: Zahtjev), zaprimljen dana 16.10.2023. godine pod brojem: 01-26-7-12-1/23.

Zahtjevom se traži mišljenje da li postoji obaveza podnošenja prijave koncentracije u smislu člana 12. Zakona o konkurenciji („Službeni glasnik Bosne i Hercegovine“, broj 48/05, 76/07 i 80/09) (u daljem tekstu: Zakon o konkurenciji), tj. pripajanja privrednog subjekta „CRVENA JABUKA MARKET“ d.o.o. Jajce, Kulina Bana broj 1, 70 101 Jajce, Bosna i Hercegovina (u daljem tekstu: CRVENA JABUKA MARKET) privrednom subjektu TROPIK MALOPRODAJA.

Konkurencijsko vijeće je aktom broj: 01-26-7-12-2/23 od 16.10.2023. godine uputilo privrednom subjektu TROPIK MALOPRODAJA zahtjev za uplatu administrativne takse. Podnosilac zahtjeva je dana 30.10.2023. godine dostavio dokaz o uplati administrativne takse.

Podnosilac Zahtjeva navodi sljedeće:

- CRVENA JABUKA MARKET je društvo ograničene odgovornosti upisano u sudski registar Općinskog suda u Travniku, pod MBS: 51-01-0041-17 i nalazi se 100% vlasništvu privrednog subjekta TROPIK MALOPRODAJA.
- Privredni subjekat TROPIK MALOPRODAJA je društvo ograničene odgovornosti upisano u sudski registar Okružnog privrednog suda u Banja Luci u 100% vlasništvu privrednog subjekta „Tropic Group B.V.“, Amsterdam, Haakbergweg 71 1101, Kraljevina Nizozemska (u daljem tekstu: Tropic Group).
- Vlasnici privrednog subjekta Tropic Group su Ivana Domazet i Bojan Risović sa udjelima od po 50%.
- Društva TROPIK MALOPRODAJA i CRVENA JABUKA MARKET djeluju kao povezana društva u sastavu TROPIC GRUPACIJE.
- Pretežna registrovana djelatnost privrednih subjekata TROPIK MALOPRODAJA i CRVENA JABUKA MARKET je trgovina na malo proizvodima široke potrošnje.

- TROPIK MALOPRODAJA kao 100% vlasnik društva CRVENA JABUKA MARKET ima namjeru izvršiti pripajanje istog, nakon čega se društvo CRVENA JABUKA MARKET biti brisano iz sudskog registra, a TROPIK MALOPRODAJA će preuzeti svu njegovu imovinu, radnike, te prava i obaveze.

Konkurencijsko vijeće kao bitne za predmetni Zahtjev ističe odredbe člana 12. stav (1) i stav (2) Zakona o konkurenciji, koje glase:

„ (1) Koncentracijom u smislu ovog Zakona o konkurenciji, smatra se:

- a) spajanje ili pripajanje nezavisnih privrednih subjekata ili dijelova privrednih subjekata;
  - b) sticanje kontrole ili dominantnog uticaja jednog privrednog, odnosno više privrednih subjekata nad drugim, odnosno nad više drugih privrednih subjekata ili dijelom drugog privrednog subjekta, odnosno dijelovima drugih privrednih subjekata, i to:
    - 1) sticanjem kupovinom većine dionica ili učešća osnovnog kapitala; ili
    - 2) sticanjem većine prava glasa; ili
    - 3) na drugi način, u skladu s odredbama zakona koji regulišu osnivanje privrednih subjekata i njihovo upravljanje;
  - c) zajedničko ulaganje na dugoročnoj osnovi, dva ili više nezavisnih subjekata, koji djeluju kao nezavisan privredni subjekt.
- (2) Sticanje kontrole u smislu stava (1) ovog člana ostvaruje se putem prava, zaključivanjem sporazuma ili drugim sredstvima kojima jedan ili više privrednih subjekata, bilo posebno, bilo zajednički, uzimajući u obzir sve pravne i činjenične okolnosti, stiču mogućnost ostvarivanja dominantnog uticaja nad jednim ili više privrednih subjekata“.

Na osnovu navedenih odredbi, Konkurencijsko vijeće smatra da se u predmetnom slučaju ne radi o koncentraciji u smislu člana 12. Zakona o konkurenciji, jer se ne radi o pripajanju dva nezavisna privredna subjekta, budući da je privredni subjekat TROPIK MALOPRODAJA vlasnik 100% udjela u privrednom subjektu CRVENA JABUKA MARKET i od ranije ima kontrolu nad istim.

Ovo mišljenje je dato isključivo na osnovu podataka navedenih u Zahtjevu, te ukoliko dati podaci odstupaju od stvarnog činjeničnog stanja, ovo mišljenje se ne može primijeniti.

**Predsjednica**

**Adisa Begić**